

天台幽溪傳燈著

維摩詰經無我疏

普爲出資及讀誦受持
輾轉流通者回向偈曰

願以此功德 消除宿現業

增長諸福慧 圓成勝善根

所有刀兵劫 及與飢饉等

悉皆盡滅除 人各習禮讓

讀誦受持人 輾轉流通者

現眷咸安樂 先亡獲超生

風雨常調順 人民悉康寧

法界諸含識 同證無上道

維摩詰經無我疏

著作著：明·天台幽溪傳燈法師

倡印者：十方佛弟子

承印者：和裕出版社

地址：臺南市海佃路2段636巷5號

電話：（〇六）二五六六四四三

非賣品・歡迎倡印・功德無量

中華民國八十三年元月敬印一〇〇〇本

維摩詰所說經無我疏序

維摩詰所說經者蓋大乘圓頓教中通方之妙典也。曷以言之。正以如來五時施教各有專門。如華嚴則專於頓。阿含則專於小。般若則專於空。法華則專於圓。涅槃則專於常。至若方等則無所專。無所而不專。已爲通方之時。適此經說於方等。得無所專。無所而不專之正。故曰大乘圓頓通方之妙典也。如寶積長者之讚佛偈云。說法不有亦不無。以因緣故諸法生。無我無造無受者。善惡之業亦不亡。此則專於圓而得兼華嚴法華般若涅槃之教也。又曰。始坐佛樹力

降魔得甘露滅覺道成。以無心意無受心而悉摧伏諸外道。三轉法輪於大千。其輪本來常清淨。天人得道此爲證。三寶於是現世間。此則專於小而得攝取於阿含之小教也。又曰。佛以一音演說法。眾生隨類各得解。皆謂世尊同其語。斯則神力不共法。至云佛以一音演說法。或有恐懼或歡喜。或生厭離或斷疑。斯則神力不共法。此則正專於方等而得徧攝圓頓秘密不定大乘諸教矣。故曰無所專無所而不專也。或逆難曰。此經旣無所專無所而不專。豈亦具足徧漸諸小教乎。對曰。非然也。旣曰無所專。豈專於小及

偏漸。然而又曰。無所不專。則是破小以成大。融偏以歸圓。會漸以爲頓。如須彌攝色。咸成帝青。如意雨珍。悉爲寶藏。無所專。無所而不專。其在是乎。此非藝言。入經自見。讀是經者。倘一遇此。苟能以是而融會之。則若大若小。若圓若偏。莫不歸於此經了義之正轍也。關中師弟。業存成解。陳隋智者。疏已云亡。然而淨名玄義。旣昭昭而可觀。性具法門。又瞭然而在目。是以不遺先見。而語義具存。第遇關鍵未開。則聊運鋼椎。肯綮不解。則稍進牛刀。將與五百長者而出色。復請釋迦善逝以解頤。題之爲維摩詰所說經。無我疏。

意用儒童之不我。以御龜氏之二無。獨不委閱者果以老僧之疏爲奚如也。

皇明天啟五年歲次乙丑季春望前五日天台山幽溪沙門傳燈下筆於楞嚴壇東方之不瞬堂

謹案天台智者大師維摩玄疏六卷。一名淨名玄義文疏

二十八卷。一名維摩大疏皆出祖師手撰。唯文疏後三卷

爲章安尊者所補。唐荆溪尊者以文疏繁廣。節爲

略疏十卷。別撰廣疏記六卷。略疏記三卷。詳佛祖統記荆

溪尊者傳遭唐會昌之厄。諸祖撰述蕩爲灰燼。五季時

螺溪尊者得疏本於金華古藏。其他各種亦藉吳

越王外護之力得諸海外再傳至宋慈雲大師奏請以天台教典編入大藏於是玄義略疏及廣疏記三種同時入藏元藏仍之明則南北二藏皆缺然觀右序云陳隋智者疏已云亡然而淨名玄義昭昭可觀云云疏中又嘗引述略疏則知當明季時文疏已亡而玄義略疏猶存也逮清初蕩益大師撰閱藏知津時則皆不可復見近世海禁大開玄疏文疏略疏及廣疏記次第來自海東前清光緒八年長沙刻經處曾刻玄疏略疏流布未廣上年疏板復燬於火嗟乎法門瓊寶一佚於唐季再

佚於清初。今者幸獲珠還。仍乏單行之本。亟宜重
刻以廣其傳。敢述所知。俾讀無我疏者。沿流溯源
有所考鏡云。丁卯孟秋月浙西徐文蔚顯瑞附識

維摩經無我疏目錄

卷第一之三

佛國品第一

卷第四之五

方便品第二

弟子品第三

卷第六

菩薩品第四

卷第七

文殊師利問疾品第五

不思議品第六

卷第八

觀衆生品第七

卷第九

佛道品第八

卷第十

入不二法門品第九

卷第十一

香積佛品第十

菩薩行品第十一

卷第十二

見阿閼佛品第十二

法供養品第十三

囑累品第十四

維摩詰所說經無我疏卷第一

明天台山幽溪沙門傳燈著

將釋此經。先定序品有無。次方入經疏解。夫經之有品。則義趣不紊。品之有序。則理緒可抽。矧通別二序。羣帙攸同。若法華之先敷六瑞。金光之預夢金鼓。故得一期宣演。大綱可提。則序品之設。諸經之所同尙者也。獨此經之初。卽冠以佛國一品。而入經敷演五事之後。長者獻蓋。而神用叵測。伽陀讚頌。而雜糅翩翩。豈非通別二序。爛然可別。今不安者。要非集經之罔立。疑是翻譯之脫訛。蓋品之

名第。或自唱如梵網。或結集置如大品。或譯人添如羅什。今欲義增。復慮獲罪。將欲已之。似於疏釋有乖義門。故於經文。仍其舊貫。而於疏解。乃義立之。卽四明大師嘗亦有云。淨名經以佛國因果爲正宗。旣無序品。諸師乃將佛國半品而爲序分。是則古人亦約義分之。準常科爲三分。初序分。二正宗分。三流通分。初序分爲二。始於如是等五事。通序也。次於爾時毘耶離城有長者子。名曰寶積。訖偈讚稽首如空無所依。別序也。止此方次以正宗佛國品。卽寶積白佛。願聞得佛國土清淨。如是則

不惟見序分正宗。二義了然。卽佛國品題。宜冠此文。如指諸掌。

○次入經疏解。準常爲二。初釋經題。二釋經文。釋題爲二。初釋譯人。二釋經題。常途則先釋經題。次釋譯人。今此異者。以其舊註先標譯人。後釋經題。今旣仍存舊註。是故然也。初釋譯人。

姚秦三藏法師鳩摩羅什譯

肇公曰。鳩摩羅什。此云童壽。龜茲國人。東晉時後秦姚氏據長安。尊爲國師。弘始年間。秦主敕僧習等八百沙門。資受什旨。於草堂寺翻譯經論。凡九

十八部。合四百二十一卷。僧叡僧肇道常等筆受。
此當其一

○二釋經題爲五。初列舊註二。初釋初題二。初標
維摩詰所說經

○二釋

什公曰。維摩詰。秦言淨名。卽五百童子之一也。從
妙喜國來遊此境。所應旣周。將還本土。欲顯其淳
德。以澤羣生。顯跡悟時。要必有由。故命同志。詣佛
而獨不行。獨不行。則知其有疾也。何以知之。同志
五百。其遵大道。至於進德修善。動靜必俱。今淨國

之會業之大者而不同舉。明其有疾。有疾故有問疾之會。問疾之會由淨國之集。淨國之集由淨名方便。然則此經始終所由。良有在也。若自說而觀。則眾聖齊功。自本而尋。則功由淨名。源其所由。故曰維摩詰所說也。肇公曰。經者常也。古今雖殊。覺道不改。羣邪不能沮。眾聖不能異。故曰常也。

○二釋次題二。初標

一名不可思議解脫

○二釋

肇公曰。微遠幽深。二乘不能測。不可思議也。縱任